

WEEK 5 - HERHALINGS VAN BERIGTE/INLIGTING IN 'N VORIGE VRYPOS

1. ALGEMEEN:

'N GELEENTHEID VIR GEMEENTES IN BLOEMFONTEIN OM HUL SENIOR LIDMATE TE BEDERF: Die bekende sangpaar, **Francois en Elizabeth** het laat weet dat hulle op **Vrydagoggend 1 September 2017** in Bloemfontein beskikbaar gaan wees vir 'n optrede. Hulle wil graag 'n lentekonsert vir Bloemfontein se senior lidmate aanbied. As daar gemeentes is wat sou belangstel in so 'n geleentheid vir hul seniors, asook 'n gemeente met 'n groot genoeg kerkgebou wat moontlik as gasheer-gemeente wil optree, kontak gerus vir Francois op 082 568 0061 – hulle wil baie graag van dié geleentheid 'n heerlike kuier maak. Besoek ook hulle webblad by www.francois-en-elizabeth.co.za



2. GEBEURE BY GEMEENTES:

FEESJAAR VIR NG WINBURG: Die **oudste NG Gemeente in die Vrystaat word vanjaar 175 jaar**. Die **NG Gemeente Winburg** is in 1842 gestig en hierdie gebeurlikheid gaan op 'n feestelike wyse gevier word. Op **26 Februarie 2017** is daar 'n spesiale gedenkdiens en word daar ook 'n heerlike koue ete aangebied met Barend Deysel wat as gaskunstenaar sal optree. Dit word 'n reunie vir alle lidmate en oud-lidmate, Winburgers, oud-Winburgers en alle kennisse wat op die een of ander manier 'n band met die gemeente gehad het of steeds het. Die **erediens begin om 09:30 in die pragtige klipkerk** en die ete word na die diens op die terrein aangebied. Vir verdere besonderhede, asook vir etekaartjies @ R60 per kop, skakel gerus die kerkkantoor op 051 881 0339 (k/u Ma, Wo en Vry tussen 09:00 en 12:00). Besoek ook die gemeente se *Facebook*-blad by [NG Gemeente Winburg](https://www.facebook.com/NGGemeenteWinburg).



NG RIETFONTEIN WORD 'N 100 JAAR OUD!: Rietfontein dink vanjaar terug aan 'n honderd jaar van Christus in aksie in en deur die gemeente. Alhoewel die geboorte van hierdie tweede gemeente in Winburg uiters pynlik was, het die Here in sy onbegryplike genade, hulle reeds vir 'n eeu lank gedra en gebruik, dáár waar hulle sy kerk probeer wees. Die gemeente se **verjaarsdagdatum is 31 Mei** en die **partytjie vind op Saterdag 3 Junie 2017** plaas, wanneer hulle die oggend met 'n **Dankfees** vier met allerlei heerlike eet- en drinkgoed, onder andere hulle beroemde pannekoek en sosaties. Die **Saterdagavond** word daar 'n **konsert** in die kerksaal aangebied. **Pinkstersondag 4 Junie**, is dit 'n **feesdiens** met nagmaal, koorsang en trompetgeskal. Alle belangstellendes word uitgenooi om saam met dié gemeente te kom fees vier. Oud-lidmate kan vir Bertus Celliers kontak by 082 784 9735, of vir Rika by 051 881 0322 (k/u Ma-, Wo- en Vrydagoggende). **As iemand iewers foto's van die NG Rietfontein beskikbaar het, laat weet hulle ook asseblief.**



3. ANDER GEBEURE:

LiG-LESERSDAG IN BLOEMFONTEIN: *LiG*, in samewerking met die NG Gemeentes Heuwelsig en Woodlands Gemeenskapskerk, bied hierdie geleentheid aan op **Saterdag 4 Maart 2017 vanaf 08:30 tot 13:00 te Emoya Estate, Bloemfontein**. Die koste beloop R275pp en sluit 'n heerlike ontbyt, asook 'n geskenkpak in.



SPEZIALE AANBOD VIR GEMEENTES! Vir elke 10 kaartjies wat jou gemeente verkoop, kry julle R275 om op 'n gemeenteprojek te spandeer (of om iemand vir die lesersdag te borg). Indien jou gemeente drie tafels van 11 kaartjies elk bespreek, ontvang die gemeente 'n LiG-intekening vir 20 mense vir 'n tydperk van drie maande. Kom geniet 'n oggend wat 'n vonkel in jou oog, 'n warmte in jou hart en 'n huppel in jou stap gaan sit. Franja (Juanita du Plessis se dogter), gaan ons harte laat sing, terwyl 'n verskeidenheid van inspirerende sprekers met ons oor praktiese- en

hartsdinge gaan gesels. Elke gas ontvang ook 'n propvol geskenkpak. **Bespreek jou plek** by Karin Rautenbach tydens kantoorure, stuur e-pos aan karin@dalajunction.co.za, of skakel 021 949 7419 / 083 293 2848. **Slegs bankinbetalings of elektroniese bankoorplasinge word aanvaar.**

VRYSTAATSE TIENERS EN JONGMENSE (13 tot 18 jr) - NEEM KENNIS! Kom geniet 'n **#imagine-experience** te **NAMPO-Park, Bothaville vanaf 18 – 20 Maart 2017**. Klik [hier](#) vir 'n kennisgewing met meer besonderhede, besoek gerus ook die amptelike [webblad](#). **Gemeentes, bring asseblief hierdie inligting onder julle tieners en jongmense se aandag!**




Almal kan gerus van hierdie beweging (*movement*) kennis neem – dit brei uit soos wat die familie vergroot - hulle Facebook-volgelingen staan al op meer as 17 000!. In 'n artikel in *e-Kerkbode*, vertel Anriëtte de Ridder (PSD: Jeug en Familiebegeleiding en feeskoördineerder van die Suid se fees) onder meer van twee lekker nuwe inisiatiewe, naamlik **#imagine young adults** en die **#imagine partners**, wat op die *crowdfunding*-beginsel werk. **Lees asseblief [hier](#) verder en kyk op watter wyse jy, jou gemeente of selfs jou organisasie, deel van hierdie beweging kan wees!**

'N SPLINTERNUWE PASSIESPEL IN AFRIKAANS: Hierdie jaar heet die passiespel, *Judas Iskariot – wat is die prys van bloedgeld?* Dit word op **Saterdag 1 April 2017 by twee geleenthede in die Sand du Plessisteater opgevoer** (sien biljet vir meer besonderhede rakende tye en koste van kaartjies).

Die oorkoepelende boodskap is vergifnis – Jesus het ons vrygespreek. Ons kan dus soos die verlore seun terugkeer, want Vergifnis wag reeds vir ons – in Jesus is dit volbring. Net so fokus dit ook op die feit dat ons verdraagsaam en liefdevol teenoor mekaar moet wees. Dit was tog die gebod wat Jesus ingestel het... Daarom was Judas ook maar net mens en is Jesus se oorwinning vir hom ook 'n realiteit.

Hierdie projek is heeltaltemal uniek! Dit is tans die grootste Afrikaanse gemeenskapsteater-projek in Suid-Afrika, waar daar meer as 70 akteurs, sangers, dansers en ekstras op die verhoog gaan wees. Die hoofrolle word deur professionele akteurs vertolk en die kleiner rolle word deur mense uit die gemeenskap gevul. Dr Niel van Niekerk is die regisseur en Jaco Bezuidenhout die musiekregisseur. Die teks en musiek is nuut en vars - Gertjan Holtzhausen het weer die teks geskryf en Jacobus Silwer het die musiek gekomponeer. Hierdie volwaardige *musical* gaan begelei word deur 'n simfonieorkes van ongeveer 50 lewende instrumente. Kyk ook gerus na 'n lok-video by [Judas Iskariot](#).



Daar gaan hierdie jaar ook 'n **Bybelse mark in die foyer** wees. **Gemeentes word uitgenooi om hulle voorstelle hiervoor in te dien** – klik [hier](#) vir meer inligting.

